

Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqqut imaattoq saqqummiuppara:

(inatsisartunut ilaasortaq Anthon Frederiksen, Partii Naleraq)

Naalakkersuisunut apeqqutit:

- 1. Savissivimmiit savissivimmullu silaannakkut ilaasunik angallassinermi pingasunnigornikkut ingerlanneqartartoq, marlunngornermut nuunneqarsinnaavaa ? taamatullu tallimannigornikkut angallassisarneq sisamannigornermut nuunneqarsinnaavaa ?**
- 2. Ullut apeqqut 1-imi taaneqartut angallassiffigineqarsinnaaneri allannigortinneqarsinnaanngippata suut tamatumunnga akornusiippat ?**
- 3. Quliminguulik/Helikopteri Qaanaap eqqaani silaannakkut ilaasunik angallassissutaasartoq Qaanaami “angerlarsimaffeqarsinnaannginneranut” suut pissutaappat ?**
- 4. Sila Pituffiup eqqaani aamma Pituffiup Savissiviullu akornani ajortillugu, sooq ilaasut Pituffimmi unnuisinnaatitaanngillat ?**
- 5. Qaanaami timmisartumut orsussaasivik naammattumik imaqarsinnaasoq pigineqarpaa ?**
- 6. Apeqqut 3-imi piumasaaqatit naammassineqassappata suut amingaataappat ?**
- 7. Kiffartuussinissamik isumaqatigiissutip qulaani eqqartorneqartup eqaannerusumik aaqqiivigineqarsinnaanera qanoq periarfissaqarpa ?**

Tunngavilersuut:

Qaanaamiit Savissivimmut, Savissivimmiillu Qaanaamut silaannakkut angallassinermi atuisut arlaleriarlutik misigisarsimavaat, timmisartooq Qaanaamiit nunatta ilaanut kujasinnerusumut pingasunnigornikkut ingerlaqqittussaq inortortarlugu, tassa ulloq

taanaarpiaq Pituffiup eqqaani sila ajorsimappat – ilaasut Savissivimmiit Qaanaamut anngutinngitsoortarmata, taamaalisoqartillugulu ilaasut Qaanaamiit ingerlaqqittussaangaluit sapaatip akunnera ilaatigut angullugu Qaanaami utaqqeqqittoqaqqittariaqarluni. Taamaattoqartillugulu ilaasussaangaluartut inuttut, aningaasaqarnikkut allatigullu annaasaqartarput.

Ilaasut Qaanaamiit Savissivimmut ingerlasussat aamma ataasiaannaratik nalaattarsimavaat, piffissap ilaatigut ullorpassuarnik utaqqisariaqartarneq, tassa Pituffiup eqqaani sila ajortillugu ilaasut tamatigut Qaanaamut oqqunneqartarmata, tamatumalu kingorna helikopteri ilaaffigisaat Pituffimmut useqarani utiinnartarluni. Uffa eqaannerusumik aaqqissuussisoqarsinnaappat, ilaasut/ilaasorluunniit ataaseq (ilaassorpassuusangimmatami) Pituffimmi unnuiseriarlugit silap iluarsinerani Pituffimmiit Savissivimmut ingerlanneqarsinnaangaluartut.

Ilaasut qulaani pineqartut ilaatigut ullorpassuit utaqqisariaqartarput, pingasunngornikkut imaluunniit tallimannngornikkut silamik arlaanilluunniit akornuteqartillugu, naak ullup tulliani sila ajoquteqanngikkaluartoq – ilaasut kinguaattooqqasut apissiffissaminnut anngunniarneqarnerat isumagineqarneq ajormat.

Taamaammat ilanngullugu paaserusunnarpoq kiffartuussinissamik isumaqatigiissut eqaannerusumik aaqqinneqarsinnaannginnersoq, tassa ilaasut silamik pissuteqartumik kinguaattoortillugit, ullup tulliani ingerlanneqarsinnaasunngorlugit ?

Apeqqutit ullut suliffiit qulit qaangiutsinnagit akineqarnissaat kissaatingaara.